


11 12

G L A T Z

C O M I T A T V S.



Inter nobiliores Silesiæ Comitatus, non infimus est Glacensis, vulgo Glatz. sui quondam juris fuit, sed Boleslaus Comes Munsterbergensis & Glacensis vendidit comitatum hunc Glacensem Ioanni Lucenburgico, Bohemiæ Regi, anno 1326. Porro Ioannes, ab Henrico principe Vratislaviensi, qui à fratre Boleslao oppugnabatur, in defensionem vocatus, dono dedit Henrico comitatum Glacensem, ea vero intentione, ut & Vratislaviam ad se traheret, quod & effecit, nam Henricus improles moriens, cum hæredem constituit, atque exinde Reges Bohemiæ gaudent titulo hujus comitatus.

Populi veteres.

Populi veteres fuere Quadi, uti & in tota Silesia: istis succedere Slavi, gens Sarmatica, generali nomine Poloni dicti.

Termini.

Comitatus hic undique amœnissimis cingitur montibus, quibus à cæteris sibi conterminis regionibus discluditur. à meridie enim sunt montes *Sudeti* & *Niviferi*, ubi altissimus monstratur mons nivis, vulgo *Schneeberg*, ad cuius pedem fons *Nissæ* fluvii scaturit. est & alius versus orientem mons eminens, quem *Wiesenberg* incolæ dicunt, inter quem & supradictum maxima copia est ferarum, atque adeo locus venatione admodum frequens. Terminatur porro & alio

monte ad orientem, vulgo *Der Gulden Esel*, quasi Aureo Asino, ita dicto ab auro & argento quod hic effoditur. Ad Septentrionem montem habet Bojemicum, vulgo *Bohemberg*, & Argenteum, *Silberberg*. Ad occasum autem *Riphæis* Gigantæisque montibus clauditur. Fluvii præcipui *Nissa*, *Steina*, *Biela*, & *Weistritz* magnam piscium copiam suppeditant. *Nissa*, vulgo *Neisse* in comitatu hoc ortus, lambens urbes *Mittelwalde*, *Habelsverde*, *Glatz*, *Wartba*, *Richenstein*, *Nissam* fluvio cognominem, *Laubenam*, & fluvios *Steinam*, *Biellam*, & *Weistritz* secum vehens, labitur ad *Schurgastum* in *Oderam*. Arva, agri, & camporum planities, pecoribus & frugibus omni-
Ager. genis abundant. Horti amœnissimi fructus arboreos, olera, & alia naturæ beneficia mira copia subministrant.

Primaria & Metropolis hujus comitatus est *Metropolis.* **GLATZ**, à qua tota regio denominatur, jucundissimo tractu sita, & pulcherrimarum domuum nitore splendida. Arce in vicino colle posita fulget munitissima. Ex hac civitate prodire viri omni doctrina & eruditione præditi; inter quos *David Origanus*, qui *Ephemerides* composuit, & *Nicolaus Henelius*, qui *Silesiæ* & *Vratislaviæ* geographiam edidit, *Francosteini* natus, clauere. Ante annos decem turris supradictæ arcis nitrati pulveris plena, & fulmine incensa, miserabilem urbi cladem attulit, saxis vicinas ædes destruentibus: qua clade liberalitate plurimorum dominorum absterfa, ad pristinum vigorem restituta est.